

續修廬州府志卷三十五

花翎道銜江南安徽廬州府知府清泉黃 雲總修

忠義傳 一

竭力忠貞匪日求名灑氣所積川溢嶽靈克符志節宇宙支撐采訪貴詳激揚義聲

三國魏

劉整鄭像魏嘉平六年鎮東將軍母邛儉上言昔諸葛恪圍合肥新城城中遣士劉整出圍傳消息爲恪所得考問所傳語整曰諸葛公欲活汝汝可具服整罵曰死狗此何言也我當必死爲魏國鬼不求苟活逐汝去也欲殺我者便速殺之終無他辭又遣士鄭像出城傳消

續修廬州府志

卷三十五

忠義傳 一

一

息或以語恪恪遣馬騎尋圍迹索得像別縛四五人將繞城走語像令大呼言大軍已還洛不如早降像不從其言更大呼城中日大軍近在圍外壯士努力賊以刀築其口使不得言像遂大呼令城中聞知整像爲兵能守義執節子弟宜有差異詔曰夫顯爵所以褒元功重賞所以寵烈士整像各募通使越蹈重圍冒突白刃輕身守信不幸見獲抗節彌勵揚六軍之大勢安城守之懼心臨難不顧畢志傳命昔解揚執楚有隕無二齊路中大夫以死成命方之整像所不能加今追賜整像爵關中侯各除士名使子襲爵如部曲將死事科

三國志  
魏紀

唐

陳知新合肥人從楊行密攻畢師鐸孫儒皆有功授先鋒指揮使尋擢團練使從劉存義伐湖南戰敗被執不屈死之家悉陷敵

新縣志引  
九國志

袁傑無爲人唐末盜亂傑招集義兵保障鄉里拒敵不勝死屍僵七日不仆賊棄諸河逆流而上將至黃金城母尋見之曰若是吾兒呼之必動呼果動鄉人神之因立廟名其處曰呼兒港

江南通志

宋

詹世勛其先婺源人祖徙家於舒城爲人修偉沈毅恂恂似不能言在縣揮金如土當機而發其勇莫敵紹興三十年累薦爲舒城縣民兵正將弟世勳副之招募強

壯結以信義淮西帥奇之薦爲義兵部將與金人拒於栲栳原金人招之使降世勳叱之誓共決死罵不已敵怒攢箭射之世勳被瘡傷重一夕不語亦不呻吟次日早呼其子大淵戒之曰我今死矣汝必繼我志言終而卒少頃復張目其長子輔謂大淵曰父告汝未答故視汝也大淵於是撫父之額而泣曰父苟終所不繼父志者有如栲栳原目乃瞑

明隆慶志

密佑其先密州人後渡淮居廬州佑爲人剛毅質直累官至廬州駐劄御前遊擊中軍統領改權江西路副總管咸淳十年以閤門宣贊舍人爲江西都統是冬元丞相伯顏下鄂州留右丞阿里海牙守之而將大兵東下

明年二月朱禩孫遣高世傑取鄂阿里海牙以兵逆擊  
執世傑荆江口兵盡潰半入江西江西制置黃萬石招  
集之且募甯都廣昌南劍義兵千餘人盡以屬佑十一  
月大兵至隆興劉槃兵敗乃嬰城自守萬石時移治撫  
州將遁懼佑不從乃調佑兵援槃且戒以勿戰未至隆  
興槃已降都統夏驥率所部兵潰圍出已而元帥張榮  
實呂師夔提兵逼撫州佑率衆逆之進賢坪兵來呼曰  
降者乎鬪者乎佑曰鬪者也麾其兵突戰進至龍馬坪  
元兵圍之數重矢下如雨佑告其部曰今日死日也若  
力戰或有生理衆咸憤厲自辰戰至日昃佑面中矢拔  
之復戰又身被四矢三槍衆皆死僅餘數十人佑乃揮

雙刀斫圍南走前渡橋馬踏板斷遂被執衆見其勇戒  
勿殺輿歸隆興元帥宋都解曰壯士也欲降之繫之月  
餘終不屈嘗罵萬石爲賣國小人使我志不得伸宋都  
解命劉槃呂師夔坐城樓引佑樓下以金符遺之許以  
官佑不受語侵槃師夔益不遜又令佑子說之曰父死  
子安之佑斥之曰汝行乞於市第云密都統子誰不憐  
汝怡然自解其衣請行刑遂死觀者皆泣下

宋史

劉師勇廬州人以戰功歷環衛官櫓港師潰賈似道欲  
東入海師勇贊之入揚州圖再舉姚峇復常州似道命  
師勇以淮兵取呂城朝廷加師勇和州防禦使助峇守  
常而以張彥守呂城合兵拒元戰失利彥馬弱陷淖中

見執元軍挾至城下招降師勇以大義斥彥彥慚退又遣范文虎來諭師勇伏弩射走之常州受圍數月援兵盡絕有羣鴟飛鳴繞城衆惡爲不祥俄而陷師勇拔砦且戰且走其弟所乘馬墮塹不能出師勇舉手與訣而去淮兵數千人皆鬪死有婦人伏積屍下見淮兵六人反背相拄殺敵千百人乃殪師勇從二王至海上見時事不可爲憂憤卒葬於鼓山

宋史張世傑傳

洪福夏貴家僮也從貴積勞爲雄江左軍統制鎮江北貴以城降元福與子大淵大源下班祇候彭元亮結貴軍復之加右武大夫知鎮巢貴招福降不聽使從子來說福斬之元兵攻城久不拔貴至城下好語語福請單

騎入城福信之門發而伏兵起執福父子屠城中貴合殺大源大淵呼曰法止誅首謀奈何舉家爲戮福叱曰以一命報宋朝何至向人求活耶次及福福大罵數貴不忠請身南向死以明不背國也聞者流涕

宋史姜才列傳

褚一正字粹翁舉武科德祐二年爲提刑諮議督戰高

沙被創自投於水

宋史

元

余闕字廷心一字天心合肥人本唐兀氏世家河西武威父沙刺藏卜官廬州遂爲廬州人少喪父授徒養母與吳澄弟子張恒遊文學日進元統元年賜進士第授同知泗州事爲政嚴明宿吏皆憚之俄召入應奉翰林

文字轉中書刑部主事以不阿權貴棄官歸尋以修遼金宋三史召復入翰林爲修撰拜監察御史改中書禮部員外郎出爲湖廣行省左右司郎中會莫徭蠻反右丞沙班當帥師堅不往無敢讓之者闕曰右丞當往受天子命爲方嶽重臣不思執弓矢討賊乃欲自逸耶右丞當往沙班曰郎中語固是如芻餉不足何闕曰右丞第往此不難致也闕下令趣之三日皆集沙班行復以集賢經歷召入遷翰林待制出僉浙東道廉訪司事丁母憂歸廬州盜起河南陷郡縣至正十三年行中書於淮東改宣慰司爲都元帥府治淮西起闕副使僉都元帥府事分兵守安慶於時南北音問隔絕兵食俱乏抵

官十日而寇至拒却之乃集有司與諸將議屯田戰守計環境築堡砦選精甲外捍而耕稼於中屬縣灑山入社土壤沃饒悉以爲屯明年春夏大饑人相食乃捐俸爲粥以食之得活者甚眾民失業者數萬咸安集之請於中書得鈔三萬錠以賑民陞同知副元帥又明年秋大旱爲文祈灑山神三日雨歲以不饑盜方據石蕩湖出兵平之令民取湖魚而輸魚租十五年夏大雨江漲屯田禾半沒城下水湧有物吼聲如雷闕祠以少牢水輒縮秋稼登得糧三萬斛闕度軍有餘力乃浚隍增陴隍外環以大防深塹三重南引江水注之環植木爲柵城上四面起飛樓表裏完固俄陞都元帥廣西苗軍五

萬從元帥阿思蘭沿江下抵廬州闕移文謂苗蠻不當使之窺中國詔阿思蘭還軍苗軍有暴於境者卽收殺之凜凜莫敢犯時羣盜環布四外闕居其中左提右挈屹爲江淮一保障論功拜江淮行省叅知政事仍守安慶通道於江右商旅四集池州趙普勝帥眾攻城連戰三日敗去未幾又至相拒二旬始退十七年趙普勝同青軍兩道攻我拒戰一月餘竟敗而走秋拜淮南行省右丞安慶倚小孤山爲藩蔽命義兵元帥胡伯顏統水軍戍焉十月沔陽陳友諒自上游直擣小孤山伯顏與戰四日夜不勝急趨安慶賊追至山口鎮明日癸亥遂薄城下闕遣兵扼於觀音橋俄饒州祝寇攻西門闕郤

之乙巳賊乘東門紅旗登城闕簡死士力擊賊復敗去戊申賊并軍攻東西二門又郤之賊恚甚乃樹柵起飛樓庚戌復來攻金鼓聲震地闕分諸將各以兵扞賊晝夜不得息癸卯賊益生兵攻東門丙午普勝軍東門友諒軍西門祝寇軍南門羣盜四面蟻集外無一甲之援西門勢尤急闕身當之徒步提戈爲士卒先士卒號哭止之揮戈愈力仍分麾下將督三門之兵自以孤軍血戰斬首無算而闕亦被十餘創日中城陷城中火起闕知不可爲引刀自剄墮清水塘中闕妻耶卜氏及子德生女福童皆赴水死

按賈伯良死節記作夫人蔣氏女

安子得臣俱赴水死甥福童戰

死姪壻花李亦自刎與此異恐明初

城中民死者以千

爲元史匆促或不及詳稽博考也

計時至正十八年正月丙午也闕號令嚴信與下同甘  
苦然稍有違令卽斬以徇闕嘗病不視事將卒皆籲天  
求以身代闕聞強衣冠而出戰矢石亂下如雨士以盾  
蔽闕闕卻之曰汝輩亦有命何蔽我爲故人爭用命稍  
暇卽注周易帥諸生謁郡學會講立軍士門外以聽使  
知尊君親上之義有古良將風烈或欲挽闕入翰林闕  
以國步危蹙辭不往其忠國之心蓋素定也卒時年五  
十六事聞贈闕摠誠守正清忠諒節功臣榮祿大夫淮  
南江北等處行中書省平章政事柱國追封豳國公諡  
忠宣議者謂自兵興以來死節之臣闕與秦不華爲第  
一闕留意經術五經皆有傳注爲文有氣魄能達其所

欲言詩體尙江左高視鮑謝徐庾以下不論也篆隸亦  
古雅可傳初闕旣死賊義之求屍塘中具棺斂葬於西  
門外洪武初詔立廟於忠節坊命有司歲時致祭云

元史

又按邵戒山元史類編注云闕姪孫宗烈言夫人實  
蔣氏德臣安安皆夫人所生江南通志記聞言公次子  
爲某萬戶所拯救余氏家  
譜言後中洪武丙子舉人

王翰字用文其先靈武人陷於元昊元初從下江淮授  
領兵千戶賜姓唐兀氏鎮廬州家焉翰襲爵仕名那木  
罕年十六領所部有能名除廬州府治中陞同知又陞  
理問官理永福羅源二縣拒泉州土帥抑莽四境又安  
擢福建江西行省郎中陳友定表授潮州路總管兼督  
循海惠三州友定敗隱居永福縣東之觀獵山爲黃冠

洪武十年辟書再下翰賦詩見志遂自引決子偁永樂

中名臣 康熙志

鮑文德舒城人至正問為萬戶侯鎮廬州路趙雙刀攻

城文德為礮石所傷而卒 康熙志

明

徐明合肥人有膽畧多智數軍中號胎裏謊授管軍百  
戶守洪都陳友諒攻新城門明從指揮薛顯開門突戰  
被執死之一云明出劫友諒營獲其良馬以歸友諒陰  
設陷穽數臨城誘戰是日明垂鞭躍馬出城射賊賊走  
追之墮穽中賊鈎取去誘之降不從見殺追封合肥縣  
男配享洪都忠臣廟官其子為指揮 康熙志

續修廬州府志

卷三十五

忠義傳一

八

后明

明史作石康  
熙志作邱

合肥人甲午歸附從克和州渡江收

太平入建康收下江南等處累立戰功授管軍上千戶

癸卯六月偽漢陳友諒舉兵圍南昌守將朱文正告急

上率諸將士往援之遇於康郎山大戰數日明奮力死

於陣諒敗上追念明等捐軀殉國命立廟於康山肖形

祀之仍追贈武節將軍飛騎尉封梁縣子 明隆慶志

朱昇

通志  
作鼎

合肥人勇悍多力善馬稍歲乙未與巢湖水

將俞通海等歸附從渡江多立戰功授管軍上千戶癸

卯七月從太祖討陳友諒遇於鄱陽湖昇奮勇迎擊面

臂中數矢而死追贈武節將軍上勇騎都尉封合肥縣

子復命有司即其死所建忠臣廟設像歲時祭之 明隆慶志



王德合肥人元季兵亂初爲他帥所得度其無成乃脫身來歸翊從渡江拔采石取太平定江南等處皆有功太祖愛其勇力授管軍上千戶癸卯七月陳友諒率兵六十萬攻圍南昌守臣告急太祖解廬州圍赴之遇友諒兵於康郎山自戊子至辛丑酣戰累日德奮勇實殲強寇死於陣友諒敗追贈武德將軍驍騎尉封合肥縣子仍命有司建廟於康郎山肖像歲時祭之

明隆慶志

宋國興定遠人世居合肥國興生而壯偉從父朝用渡江年十八以總管先登與陳也先戰南臺上解白龍袍衣之敵誤以爲上也攢槊刺之死常遇春翼上潰圍出是日妻曹氏聞變投井上命以國興官授其弟晟

康熙志

瞿能合肥人父通洪武中累官都督僉事能嗣官以四川都指揮使從藍玉出大渡河擊西番有功又以副總兵討建昌叛酋月魯帖木兒破之雙狼寨燕師起從李景隆攻北平與其子帥精騎千餘攻張掖門垂克景隆忌之令候大軍同進於是燕人夜汲水沃城方大寒冰凝不可登景隆卒至大敗已又從景隆進駐白溝河與燕師戰能父子奮擊所向披靡日暝各收兵明日復戰燕王幾爲所及王急佯招後軍以疑之得脫去薄暮能復引眾搏戰大呼滅燕斬馘數百諸將俞通淵滕聚復率眾來會會旋風起王突入馳擊能父子死於陣

明史

賜謚忠烈通志

余瑱合肥人北平都指揮使同官謝貴密謀以拒靖難師貴死瑱走居庸關宋忠承制令瑱守關瑱簡練閱卒得數千人將進攻北平文皇以居庸險隘為北平咽喉命指揮徐安等往擊之瑱且戰且守援兵不至棄關走懷來兵再敗被執不屈死之明隆慶志

國朝乾隆四十一年

賜謚烈愍通志

徐凱合肥人以開國功為茂州衛指揮使守松潘出征賈哈刺并刀幹孟皆有功陞都督僉事鎮守四川靖難兵起充副總兵官練兵臨清出鎮滄州與吳傑平安等

續修廬州府志

卷三十五

忠義傳一

十

相為犄角兵敗被執不屈死明隆慶志

國朝賜祀忠義祠通志

甯忠合肥人累官都督建文初充征虜右副將軍與駙馬都尉李堅從大將李景隆進拒北平戰於真定敗奔滹沱河再戰又敗與都督顧成都指揮劉遂皆被執不

屈死明隆慶志

褚能合肥人永樂間官懷遠將軍壽州衛指揮同知洪熙元年改廬州衛宣德二年調征交趾與子斌俱陣亡追封斌懷遠將軍孫英襲廬州衛指揮同知八世孫翰以海運功積官左都督翰孫熿熿子楷均襲職康熙志陳懷合肥人襲父職為真定副千戶永樂初積功至都

指揮僉事從平安南進都指揮使莅山西都司事再從  
張輔禽安南賊簡定從都督費瓛征涼州叛人虎保皆  
有功仁宗立進都督同知代梁銘爲總兵官鎮甯夏進  
左都督留鎮四川言官劾懷僭侈踰分召還正統二年  
以原官鎮大同九年與中官但住出古北口征兀良哈  
還封平鄉伯十四年扈駕北征死土木贈侯諡忠毅子  
輔襲爵輔卒子政嗣鎮兩廣久自陳軍功乞世券詔予  
之政卒子信嗣宏治中卒無子弟俊嗣指揮使明史

金玉度字冲若合肥人崇禎甲戌武進士性溫雅不類

武人守崇明回里寇至協守時雍門率眾家僮數十人

巷戰力屈死之康熙志

續修廬州府志

卷三十五

忠義傳一

十一

黃克嘉

通志作克家

合肥武進士道年子嫻韜畧善騎射崇

禎末任湖東守備山賊聚長塘克嘉兩次討平之福建

閩羅宋三家賊烏合萬眾憲檄廣建諸營合勦克嘉臨

陳先登因馬蹶遇害將死掀髯語賊曰毋令血污我鬚

賊稱好漢時甲申七月十九日也

康熙志

國朝乾隆四十一年

賜謚烈愍

通志

趙之璞字連城合肥人廬州衛指揮同知張獻忠寇廬

州之璞分守小東門城潰與賊遇四牌樓戰死

康熙志

程楷字畸人合肥人豐偉端凝讀書於大蜀之雪霽山

房所爲文極奇縱天啟乙丑成進士知平湖縣陟南禮

部郎出守東昌屬吏有以陋規進者峻拒之歷雲南參政未久歸養壬午郡城被圍楷與經歷鄭元壽明史作綬守南薰門五月七日賊眾登城力戰死之越數日就殮面色如生配高氏聞難投繯漕撫史可法爲文祭之狀聞贈光祿卿廕一子入監讀書祀鄉賢康熙志

國朝乾隆四十一年

賜謚烈愍

通志

趙嗣蕃字干之合肥人邑諸生城潰嗣蕃衣冠坐堂上賊強之跪不屈啗以衣馬不受賊怒牽至西門縛於樹罵不絕口鉗其舌以血噴之死後兩學具呈請彰士節

康熙志

續修廬州府志

卷三十五

忠義傳一

十一

張四哲合肥人乙亥率弟四美四奇戰城下不勝謂兩弟曰郡城來日必陷與其被戮辱死不如舉家清白死遂偕弟及妻女等一十五口盡投於井康熙志

國朝乾隆四十一年

賜祀忠義祠

通志

吳士任字顯伯合肥人郡諸生以忠義自誓城陷力戰被創死康熙志

蔡世和字強子合肥人鄉賢悉之孫也邑諸生罵賊死

康熙志

朱應珍合肥人素行不阿崇禎壬午城陷罵賊死越三日兩子入城至演武場遙見一屍若搖動趨視之其父

也枕之哭殮焉

康熙志

張宏化字駢公合肥人崇禎諸生鼎革後焚其衣巾不試越月語家人曰死期至矣整冠別父愴然而逝

康熙志

高翰冲字雲翔合肥人文行素優肄業蜀山僧舍以古人自命甲申聞變涕泣累月投繯而殞

康熙志

黃得功號虎山開原衛人其先自合肥徙早孤與母徐居少負奇氣膽畧過人隸經畧爲親軍累功至遊擊崇禎九年遷副總兵從總督熊文燦擊賊於舞陽麇光固閒最又從擊賊馬光玉於浙川大破之詔加太子太師署總兵銜十三年從太監盧九德破賊於板石畝賊革裏眼等五營降十四年與王憲分護鳳陽泗州陵駐定

遠張獻忠攻桐城得功與劉良佐合擊之鮑家嶺賊敗遁追至山潛轉戰十餘日所殺傷獨多明年移鎮廬州十七年封靖南伯福王立江南進封侯命與劉良佐劉澤清高傑爲四鎮督輔史可法慮傑拔扈難制置得功儀眞陰相牽制明年傑欲趨河南規取中原詔得功與劉良佐守邳徐傑死得功遂遺鎮廬州左良玉東下以清君側爲名至九江病死軍中立其子夢庚命得功趨上江禦之駐師荻港得功破夢庚於銅陵解其圍命移家鎮太平一意辦賊論功加左柱國得功戰荻港時傷臂幾墮以帛絡臂佩刀坐小舟督麾下八總兵迎敵忽飛矢至中其喉偏左得功知不可爲擲刀拾所拔箭刺

吭死其妻聞之亦自經得功每戰飲酒數斗酒酣氣益厲喜持鐵鞭戰鞭漬血沾手腕以水濡之久乃得脫軍中呼爲黃鬪子其軍行紀律嚴正無敢犯所至人感其德廬州桐城定遠皆爲立祠葬儀眞方山母墓側

明史

國朝乾隆四十一年

賜謚忠桓

通志

楊彪原名雄字旦文合肥人幼喜讀孫吳書通古今成敗在黃得功營積功至總兵官甲申聞變自刎死

采訪冊

楊達合肥人襲杭州右衛前所正千戶以廉能稱正統十三年隨軍征金華處州盜賊至武義縣首先禦賊歿

於陣贈指揮僉事

浙江通志

續修廬州府志

卷三十五

忠義傳一

十四

潘恩合肥人雷州左所百戶隆慶四年海寇猖獗恩率軍防汎遇賊於沙頭洋奮勇赴戰中鎗而亡眾憫之給

其葬事

廣東通志

方四合肥句者賊圍城四伏水中倏從水底躍起把一

賊同人水死

縣志

汪河舒城人嘗師余闕以文章名從渡江爲行中書省掾數陳時務太祖高其才進大都督府都事使察罕議論稱旨後奉命偕錢楨至河南報擴廓聘爲所留太祖前後七致擴廓書終不報洪武元年大軍下河洛擴廓走定西河始得歸被拘凡六年帝甚嘉之進吏部侍郎備陳西征方畧二年改御史臺侍御史九年拜晉王左

相親御便殿諭遣之居數載卒於官

明史楊元杲傳

王仁舒城人趨勇善騎射太祖駐兵和州隸帳下累功授管軍千戶癸卯從上親征友諒大戰於鄱陽湖遂歿於陣上追錄効忠死敵之臣贈武毅將軍飛騎尉封舒

城縣男建廟於康山肖像祀之

明崇禎志

姚壽字維祺舒城人成化甲辰進士授行人擢御史二十年不遷正德中屢疏指斥中貴爲逆瑾所惡謫貴州驛丞慮不免自裁以死抗直邁難聞者惜之

康熙志

胡守恒字見可舒城人幼喪母每逢霜露輒感泣事後母如所生崇禎戊辰進士授嘉興推官以清剛爲直指所特重因陪巡撫德清令墨迹上之令伺守恒出入金

菜蕩納署中守恒歸急命持去勒其人以病免甲戌召試平臺改翰林院編修晉東宮講官一日上命東宮講論語大悅命守恒條酌御前諸章奏敷陳稱旨諭好侍東宮以需大用庚辰較禮闈事竣乞歸養疏十上得允抵家卽倡義賑荒壬午張獻忠陷舒城被執罵不絕口死最慘烈漕撫史可法疏聞贈少詹事諡文節賜祭葬蔭一子入太學配孔氏難後攜二子奉姑僦居江甯宗戚之渡江而南者踵至命二子盡納之每食與共而朝夕自噉粥糜壬辰返故廬值歲凶典簪珥得米百餘斛設賑於石佛寺

康熙志

馮正舒城人中軍都督府僉事正德七年征流寇至洛

賊走渡河身先士卒追之殺獲甚眾會雨下如注後軍不繼遂死於賊時三月初八日也事聞令立祀洛河原上每歲於死事之日致祭贈洛州伯子大全嗣縣志郭象儀字維修舒城人以鄉舉選授四川順慶府推官時值土酋作亂勢甚猖獗奉檄帥師討之奮身當先見賊勢逼成都致書諸帥共進軍威乃震賊遁乘勝搗賊穴遇害事聞贈光祿卿蔭一子廬州衛千戶崇祀報功

祠

縣志

葉巨卿字弼輔舒城人官平海衛後所副千戶嘉靖中領水師守泥瀘灣巡徼南日寨會倭寇船至迎風鏖戰生擒百餘人次年賊颿風夜半入劫堅壁捍禦力戰身

續修廬州府志

卷三十五

忠義傳一

十六

被數十創死

福建通志

汪澤廬江人驍勇有志節吳元年任管軍千戶鄱陽湖戰歿贈武節將軍驍騎尉封廬江縣子祀康郎山康熙志

濮英廬州人初以勇力爲百夫長積功至西安衛指揮坐軍政不修召還詰責遣葉昇代之昇更言其賢令還衛洪武十九年太祖命耿炳文選陝西徒司衛所卒備邊惟英所練稱勁旅加都督僉事明年命率所部隨大將軍馮勝北征抵金山降納哈出遂班師而以英將奇兵三千人爲殿納哈出餘眾竄匿者尚數十萬聞師旋設伏於途謀俟大軍過竄取之未發英後至猝爲所乘衝突不能出馬踣遂見執敵旣得英思挾爲質英絕食



不言乘間引佩刀剖腹死事聞贈金山侯諡忠襄明年進贈樂浪公封其子璵爲西涼侯祿二千五百石予世券二十三年命練兵東昌又令駐臨清訓練士卒二十五年詔還同宋國公勝等簡閱山西士馬璵能修父職帝甚嘉之復令籍山西民兵所籍州縣最多事集多事集而不擾明年坐藍玉黨戍五開死

明史

陳植廬江人元末舉鄉試不仕洪武間官吏部主事建文二年官兵部右侍郎燕兵臨江植監戰江上慷慨誓死部將有議迎降者植責以大義甚厲部將殺之以降且邀賞燕王怒立誅部將具棺斂葬植白石山上

明史陳性

善傳

續修廬州府志

卷三十五

忠義傳一

十七

國朝乾隆四十一年

賜謚烈愍

通志

周璽字天章廬州衛人宏治九年進士授吏科給事中三遷禮科都給事中慷慨好言事武宗初卽位請毀新立寺觀屏逐法師真人停止醮事並論前中官齊元鍊丹糜金罪頃之以久雨偕同官劾侍郎李溫太監苗達九月以星變復劾溫及尙書崔志端熊翀賈斌都御史金澤徐源等翀溫澤因是罷帝遣中官韋興守鄖陽璽力言不可尋復偕同官言邇者聰明日蔽膏澤未施講學一暴而十寒詔令朝更而夕改冗員方革復留鎮監撤還更遣解戶困於交將鹽政壞於陳乞厚戚畹而駕

帖頻頒私近習而帑藏不覈不可不亟爲釐正不聽正德元年復應詔陳八事中劾大寮賈斌等十一人中官李興等三人勳戚張懋等七人邊將朱廷解端李稽等三人未幾言陛下卽位以來鷹犬之好糜費日甚如是不已則酒色游觀便佞邪僻凡可以悅耳目蕩心志者將無所不至光祿上供視舊十增七八新政已爾何以克終御史何天衢等亦以爲言章下禮部尙書張昇請從之帝雖不加譴不能用也明年擢順天府丞璽論諫深切率與中官牴牾劉瑾等積不能堪至是命璽與監丞張淮侍郎張縉都御史張鸞錦衣都指揮揚玉勘近縣皇莊玉瑾黨三人皆下之璽辭色無假且公移與玉

止牒文玉奏璽侮慢敕使瑾卽矯旨逮下詔獄榜掠死瑾誅詔復官賜祭恤其家嘉靖初錄一子

史明

盧謙字吉甫廬江人萬曆三十二年進士授永豐知縣擢御史出爲江西右參政引疾歸崇禎八年二月流賊犯廬江襲陷其城謙服命服危坐中門賊至欲屈之罵曰吾朝廷憲臣肯爲賊屈耶賊怒殺之投尸於池水盡赤舉人張受畢尹周亦不屈被殺謙贈光祿卿予祭葬廕一子崇祀鄉賢忠義祠

史明

國朝賜謚烈愍

廬江新志

張宏任字曾士廬江人崇禎壬午進士授四川威遠知縣時賊勢猖獗宏任誓死守城令長子振祚領數騎突

圍夜出求救未至城陷爲賊所執誘以官宏任曰我爲國守土牧民今日之事有死而已肯從爾作賊耶賊怒殺之甚慘子振祚振祺名有傳

康熙志

國朝賜謚節愍祀鄉賢祠

縣志

樊孔學廬州衛百戶崇禎乙亥寇圍城孔學領眾出北門奮擊眾潰被執遙語城上曰賊罄兜皆紙不足懼但慎防禦可也賊怒磔其尸

康熙志

馬應奎字守卿廬江人以武職從督輔史可法征戰有功屢陞南京大教場坐營叅將加副將乙酉與可法同殉於揚州先二日知城必不守預作家書報父母有不愧鬚眉四十年之語祀忠義祠

康熙志

續修廬州府志

卷三十五

忠義傳一

十九

呂學望字渭濱廬江人商邱丞佐治一載以疾歸崇禎乙亥寇變同御史盧謙在城籌守禦風雨晝晦冥賊攻轉急城陷學望衣冠危坐賊入門厲色叱之罵不絕口賊殺之縱火焚其舍子登奎奔救求得其骨以殮葬於

鼓架山南祀忠義祠

縣志

張應弼字二宿廬江人官嘉祥典史致仕崇禎乙亥寇變率子正顏正庭正侗姪建昌主簿正蒙協力守北門及城陷冠服坐中庭厲聲罵賊賊怒斫斷其臂碎首而死子姪殲焉其僕耿大耿二見主被難奮力格鬪死之

祀忠義祠

縣志

談耀祖字華江廬江人諸生中萬厯丙子副榜寇薄城

下耀祖建議守禦及城陷罵賊不屈死之子之藻等五人同被殺祀忠義祠

縣志 按新修縣志作子之藻之芹之茆之芷等

許三俊廬江人及弟三宅姪鍾穎鍾元鍾涓鍾碧鍾燦俱邑諸生崇禎乙亥城被賊圍賊冒雨潛入水關三俊及弟禦之被殺餘俱力戰死祀忠義祠

縣志

柳生金廬江諸生流寇至同生員談華澗等晝夜守禦城陷爲賊所執怒罵不屈死祀忠義祠

縣志

李陽春字育和廬江人陝西永甯衛經歷弟先春字元初陝西行都司經歷崇禎乙亥流寇至時兄弟俱歸里知縣吳光龍聞其智勇請入城守禦及城潰與賊鬪死

祀忠義祠

縣志

夏斗光字燦霄廬江人以祖守富征苗功襲廬州衛左所百戶崇禎十六年海寇劉六龔旺等沿海剽掠調任揚州海防叅將甲申十月率子元勳入海擊賊颶風大作戰艘漂散父子殊死戰援兵不至俱溺死祀忠義

縣志

黃隆廬州人雷州左所副千戶隆慶五年掌錦囊所印值倭寇犯城鋒銳莫禦眾皆潰散隆獨挺身力戰身受數十創遂遇害事聞恩卹其子繼勳

廣東通志

陳經畧與何其鳴王大年陳國鼎張振之張振羽孔昭劉哲嚴正中李之彩張桂芳劉旭崔巍陳經制姚履吉徐延典曾宏道汪應乾李繼剛張源夏偉柯正榮俱廬江諸生崇禎乙亥及監生張治猷張治矩張星煒張宿

遠李豔林等在城禦流寇城陷俱不屈死縣志

李之青一作清廬江人崇禎十七年闖賊陷太原被執罵

賊死

國朝乾隆四十一年

賜謚烈愍縣志

桑世傑無爲人亦自巢湖來歸趙普勝有異志世傑發其謀普勝逸去從渡江以舟師破元水軍授秦淮翼元帥下鎮江狗金壇丹陽攻甯國長槍諸軍克水陽平常州判行樞密院事畧地江陰宜興張士誠拒高郵遣元帥欒瑞戍石牌太祖命永安及世傑擊之世傑力戰死太祖念其功贈安遠大將軍輕車都尉永義侯侑享太

續修廬州府志

卷三十五

忠義傳一

二十一

廟子敬以父死事累官都督府僉事洪武二十三年封徽先伯歲祿千七百石予世券明年同徐輝祖等防邊尋令屯軍平陽坐藍玉黨死明史

周讓字克遜無爲人洪武中監生通敏博辯倜儻尚氣節以劉基薦任給事中永樂初兩使西域被拘懾以威勢徙之荒野瀕死者數四讓終不屈諭以本朝恩信辭旨嚴正卒令番人隨之入貢太原劉寅謂與蘇中郎無異而宣揚國威始終王事似又過之有重使古刺集備

載其事

康熙志

錢策字國猷無爲人萬曆辛丑進士入南刑部東甯焦侯子毆殺弈客李秋誣以盜諸司畏其勢不敢問策按

其獄論如法以此得名改職方以部民力攻漕撫李三才與諸賢論不協出守貴陽聽調回籍天啟初起光祿少卿歷南勛卿後推操江通政少司寇不果用乙亥寇亂有孤城善後之疏壬午城陷被執不屈死之贈大理寺卿蔭一孫入監讀書

康熙志

沈志傑無爲人武生崇禎辛巳流賊犯境率子姪可仕可則以鄉兵六十餘人乘夜斫賊營不勝遂俱罹難州上其事允建祠祀朱芾煌作戰城南弔之

康熙志

路寬字勅初無爲人少喜兵謀工技擊崇禎間流寇肆亂州人羣舉寬爲守城長州守請諸上臺授虛銜把總令統鄉練壬午春賊入州界寬率鄉兵數十人離城北

續修廬州府志

卷三十五

忠義傳一

二十一

十五里之獲冊嶂與賊遇奮力殺賊賊勢眾圍之所率鄉兵奔潰寬力禦殺賊數人遂爲賊殺同時有王加惠者素以武勇聞亦被殺

州志

吳之默字師時無爲人叅議廷翰曾孫也少有雋才三副鄉榜晚領歲薦適流賊破州城掠其家默抗言拒之值賊蹂躪學宮默乃整肅衣冠趨罵之曰賊何敢犯聖廟獨不畏天乎賊怒攢槊刺之死

康熙志

徐日章無爲人崇禎二年選貢任山東滋陽縣縣丞署縣事崇禎十四年縣被兵破殉城死

州志

丁希任無爲人庠生獻賊入境挾以行不從大罵投水

死

采訪冊

汪有震無爲人儒士崇禎甲申之變夫婦殉難吳名鰲  
爲之傳

采訪  
冊

廖永安字彥敬巢縣人德慶侯永忠兄也太祖初起永安兄弟偕俞通海等以舟師自巢湖來歸太祖親往收其軍遂以舟師攻元中丞蠻子海牙於馬場河元人駕樓船不利進退而永安輩操舟若飛再戰再破元兵始定渡江策頃之發江口永安舉帆請所向命直指牛渚西北風方驟頃刻達岸太祖急揮甲士鼓勇以登采石鎮兵皆潰遂乘勝取太平授管軍總管以舟師破海牙水柵擒陳兆先入集慶擢建康翼統軍元帥以舟師從取鎮江克常州擢同僉江南行樞密院事又以舟師同

常遇春自銅陵趨池州合攻破其北門執徐壽輝守將遂克池州偕俞通海拔江陰之石牌戍降張士誠守將欒瑞擢同知樞密院事又以舟師破士誠兵於常熟之福山港再破之於通州狼山獲其戰艦以歸遂從徐達復宜興乘勝深入太湖遇吳將呂珍與戰後軍不繼舟膠淺被執永安長水戰所至輒有功士誠愛其才勇欲降之不可爲所囚太祖壯永安不屈遙授行省平章政事封楚國公安安被囚凡八年竟死於吳吳平喪還太祖迎祭於郊洪武六年加贈開國輔運推誠宣力武臣光祿大夫柱國已又改封永安鄖國公無子授其從子昇爲指揮僉事

明史

廖鏞字大聲永忠孫與弟銘同學於方孝孺任散騎舍人累官提督方死二人收其遺骸葬聚寶門外被收論

死 康熙志

國朝乾隆四十一年

賜謚節愍 通志

陳冲巢縣人從征陳友諒戰鄱陽湖死之追封爲巢縣

子 康熙志

李紹賢字崇德其先巢人編伍泗州正德丁丑舉進士除行人篤學敦行遇事果決以小臣抗疏諫止南巡廷杖五十創甚數日死邸中蕭然二僕爲具含斂聞者泣

下嘉靖初蒙卹典蔭一子入太學 康熙志

續修廬州府志

卷三十五

忠義傳一

二十四

曹同申 通志作 字幼伯巢縣人任湖廣鄖西知縣鄖經

殘破又安插降寇署事者僅於江干棲泊同申莅任集流移修城垣爲固守計忽張獻忠納降寇爲內應倉猝被執同申護印不與死之當事疏請照郝景春例優恤

康熙志

國朝乾隆四十一年

賜謚節愍 通志

楊鴻功字冲若巢縣人諸生乙亥賊去後入城細訪忠孝節義闡幽發微錄成一書名曰屬陬錄罹鋒刃者男婦凡一萬三千餘人義婢僕罵賊不屈者皆錄之壬午城復陷偕兩子寓大力寺賊執見其渠魁鴻功說以天



道人事聲色俱厲將被殺兩子爭以身代皆死之一時  
傳爲孝烈云

康熙志

趙宏璧字元白張愈奇字孟庸葛遇明字澹如張拱祿  
字緩之嚴成惠字濟之張弓字天猶王善慶字爾餘以  
上七人皆巢邑諸生又彭長齡字修祺俱於城陷之日

罵賊被害

康熙志

陸合新字涵臺巢縣人舉人崇禎乙亥流賊陷巢合新  
衣冠端坐賊脅之使跪合新曰我三十年孝廉肯爲鼠  
輩屈膝耶拔劍斫賊被殺事聞奉敕建坊

康熙志

徐奇巢縣人諸生城破日謂妻女曰我家世清白不可  
受辱汝等當自盡親視其妻及二女就縊一妹歸甯亦

續修廬州府志

卷三十五

忠義傳一

二十五

自剄然後從容自縊

康熙志

楊無塾巢縣人諸生明亡不食七日而死

康熙志